

湛 淵 集

白
珽

文碩閣

wenshuoge.com

目录

关于我们

提要

湛渊集序

湛渊集

湛渊集附录

3

5

6

7

19

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

【臣】等谨案湛渊集一卷元白斑撰斑字廷玉钱塘人以李衍荐授太平路儒学正官至兰溪州判官致仕结庐西湖之金沙滩榜之曰湛渊因以自号晚复自号栖霞山人成化杭州府志载斑湛渊集八卷文渊阁书目尚着录今已久佚此本为近时杭州沈崧町所辑凡赋二首诗六十三首文六首冠以戴表元序而附以宋濂所作墓志表元序称其诗甚似渡江陈去非濂志载刘辰翁之言称其不为雕刻苛碎有云山韶护之音又月泉吟社第十八名唐楚友者即斑之寓名谢翱方凤等亦评其格调甚高陶九成撰辍耕录载其演雅十首盖斑在宋咸淳中已与仇远同以诗名入元后二人皆应荐为儒官坎坷不达退老湖山出处亦畧相近其集皆散佚之后经后人重辑畧存什一而远所撰金渊集以永乐大典全部收入恭逢

圣代右文获邀

睿鉴重得刊行而斑集以永乐大典未收无从裒录故所传祇有此本其中又间褫伪作如成化杭州府志所载三月八日过西马塍一首中四句全与月泉吟社诗同而第二句以塍字与晴声名字同押是于至正之初已用洪武正韵其为依托淆混不问可知是则与远所遭有幸有不幸矣然吉光片羽终足宝贵固不妨与远并传也乾隆四十四年二月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

湛渊集序

日余得白廷玉姓字于周义乌往还书中其赋铜浮沔一篇尤清驯可念自是欲识廷玉逢人輒问之而廷玉授书北關数里外栖栖然穷书生耳时节一入城不能与故人从容立谈而去则余无自而接廷玉焉一日僂褊博之衣忽来顾余逆旅中辞倾意酣慨然有古人班荆之喜倾蓋之诚又出其自寫诗数十百篇赠余以其有以自重也愈益念之昔者杭为行都士非欲售其业者不至杭诗虽非干世之业而自山林攻诗者一涉足于杭而迁焉若杭人之所自为诗则迁愈甚何也累于知也今夫士大夫之居游于杭者皆无前时之心而余之得廷玉与廷玉之得于余岂不亦有可言者哉廷玉诗甚似渡江陈去非而尝讳言去非又特好记览每一篇必欲令注波于六经之渊披条于百氏之畹诚放此不止余何云以得廷玉哉剡源戴表元帅初父撰

湛渊集

元 白珽 撰

西湖赋

杭之有西湖不独如人之有眉目也如楚有金如蜀有锦人得贵而玩之也凡水在天地间由山而出由地而受为里合万有六千奚止此水可夸絶于天地哉顾一州一县理所在水之东者皆西湖也潁有之松有之山阳四明类有之独在杭者齿响诸夏而笔骋羣彦是盖有明珠玉树不待斲而成大圭圆璧不待纆而贵者矣是湖也发源南北之诸峯而风气蔓延乎东州之列岫近而秦望逺而桐扣左龙飞之两乳右凤凰之孤睇势将合五州之芳泽集万山之鲜溜岂惟武林之一泉【武林即灵隠山也俗称钱塘门里太乙宫小阜非】能专此江北江南之秀原夫竒状天造胜境【一作丽景】人为古称图画之如则陋今日蓬萊之山亦非若欲知三叹望洋之盛当不憚登一览众小之危怅天地之尤物何简牒之偶遗于邳侯之六井获肇见于唐碑荡海滨【一作濒】之泻卤弭疾厉于羣黎今衍之而为井十或通贯乎园池继崇隄而节水将下塘而注陂羌运漕而达河亦溉旱而涵弥泽及田畴之广乃继闻于太傅之记辞钱氏置千兵而设撩陈氏述古资众僧而缮治既大备于苏公树三塔于中流横六桥于长隄复继志于赵侯与□【音筹】扩波光于板目续麴院之一支亭馆日增而月益崇筑前防而后随此特表其人为之序迺以见夫天造之机南北两峯亦有祠宇譬之 蒙为望于鲁皇妃保叔双擎宰堵截羣峯之骏奔为西湖之门户冠之以南屏襟之以赤土宫其湄以致斋圃其墟而阅武烟霞乍举白云不去金钟无声王岑有数鷗鸡延为向背灵鹫衍为胥附五峯【飞来白猿莲花稽留月桂】指列乎虎林三竺骈罗乎王女按驼巘而巾子巍如带束【一作栗】山而石甌酷似在水中央孤立一屿辽鹤不来处士谁与幸庾梅之犹昨惜陈柏之非古由四刹【报恩智果广化玛瑙】负鳌而徙成太一祝厘之所复有寶莲瑞石逺映胥山之辅金地七寶【南屏至此皆叙绕湖山名】翠瓦丹柱写影乎水汧凡此前后联络复多岭隄葛公已往而丹井不改仙姥既去而慈云如故二麦当风篁之冲胭脂割黄泥之据万松东接乎宫垣栖霞南沿乎岳墓紫坊铁冶石人大青之俦散不计其在处中有水竹青芝法华大悲桃花瑞冈之相背巢沟龙驹之并驰咏呉王之枫木表金姬之杨梅抑不过因人烟之所聚曾不若朱野葛隄之得人而竒洞则有龙 香林水乐石屋呼理公之白猿避里人之苍蝠烟霞【后即蝙蝠洞】干湿二洞【在栖霞岭】往往剜岩而嵌谷虽形势之或殊皆所以发湖光而增山绿泉石井潭涧谷实繁厘为十八合为一源濯惠因之沧浪防金沙之潺湲冷可洗耳甘可涤烦【旁城有甘泉坊】祷白鱣而祠乌龙记水鱼【龙井】而碑灵鳗限王为池跳珠为轩香山六一参寥东迁各井其井各泉其泉终归于【一作乎】一万顷之湖天若也【一作夫】园池楼观佛宫仙宇辩口不能殫其名巧厯不能知其数余固拙于言辞始槩陈其泄露尚虑齐人不知有稷下徂丘徒知有管仲晏子湖咏维百先言御园爰有聚景图经所尊致坤宫之孝养据震位以生蕃来四朝之游幸揽众逺以平吞【揽逺堂名】南有翠芳兰棧在焉【御舟名】接蓬萊于中泚【甘园有水中蓬萊堂】宾慧日于前轩北有玉壶红鵑尚存创于鄜王 于慈元去环碧兮百櫂隔水月兮一垣庆乐有梅關桂林之胜珍鸟异兽之繁【内畜天鷲牯牛 鹿三尾 等】亭连栋为十锦碑蚀【一作角】苔以千言记南园之絶景

扁西湖之洞天此皆始属于禁籞又不但尝锡之侯藩次则仰真珠之高寒听水乐之声在【高寒声在皆园中堂名】云洞居下湖之左古柳列昭庆之外得万景之天全揽【一作擅】九曲之紫翠【万景天全堂名前有紫翠间亭】总宜尽晴雨之奇养乐集雕镂之艺【廖氏九经等书镂板其中】梅冈班衣择胜秀野蔼梅坡之绿阴逆【一作通】花家之红霭尚名苑与胜圃滋角奇而鬬异矗不知其几百十所所可言者特言其最堂则有德生溥泳飞之仁依光觉贪浊之迷伟观兴顽懦之志湖山广寿乐之基三贤先贤序列一隄表义夫节妇三十九人之乐石俨大人君子千载一心之令仪閤雪江之讲肆【湖优讲堂在新路】褰冰壑之书帷【金渊书堂在南山下】隐居思真玉莲【旧名一清】翠樾九师者美尚可按迹于品题亭称冷泉旁连壑雷上有天香下有客儿花光巧于公输通掩于招提春雨为观香月为隣水竹院落无边风月见天地心以总之【皆贾氏亭馆名】池有涌金金牛白瑶池白洋分占湖之四涯林塘之凿花径之构各择其地各揭其楣非窥园则莫知礼重崇报有国所祠夏禹据城隍之堞神胥峙辇道之旆旌金祝之奋忠慨朱泚之蹈危【皆湖上捍御金兵死节者】嘶府君之神马游宰相之白衣海州死节【张玘】鄂国锡圭传呗林于霍山之阜荐菊泉于嘉泽之墀维庙食于百世皆功德搜于祀典【一作祝司】非若倚草附木徒祸福于六时陵墓则有后妃嗣之攒宫侯王君公之莹碑朱少章之节旄已落马三寶之壶蜂不飞和靖赞宁花翁紫芝【孙惟信赵师秀】皆炳乎山灵水秀【一作斐】之潜辉惟塔【阙】教也太乙奠福曜之临【阙】防先哲之【阙】四圣显应报阴相于中兴三茅表忠见阐灵于内向安晚峙玉【一作上】清之下初阳台玉清之上云涛灵曜崇真希夷明真神仙虽藏幽占爽隐显于【一作乎】此湖要不若佛寺兰若后先乎重山复水之广松门九里袁公是崇【仁敬】七峯两涧灵隐其中秀石奇木灵泉怪峯兼幽人禅衲之盛将互见于累代能言之钜公健竺有三连薨接壖观自下而中而上始王圉而臻大士之宫神桧重荣御梅犹红草堂绕枕流之翠香林挂古藤之虹礼寶掌而登天岩瞻珠鬘而下乳峯前生仙而广利【普福寺】后月桂而洪钟【集庆寺】圆觉藏思陵之宸灵芝抱越王之弓遡云扉之幽窈【显庆寺】抚灵石之玲珑【演福寺】现长耳之妙相演句丽之慈风南屏列家人之象瑞龙谿奇观之胥五百应真万钧巨釜画廊绚日铁塔插空惟净慈为南山众刹之宗玛瑙而坡鸟窠而丛佛三寸不为小楼十三以龕其像佛百丈不为大舟万斛以维之踪借竹智光埽缶中庸惟寿星为北岭丛林之雄岂唐朝四百八十犹有存者而宋兴几三百载损益其中楼阁则丰乐中峙据湖之防丛以亭榭附以閤闾鱼庄曼衍柳洲萦带竹山城而可眺迎光【张循王园楼】云而不碍清旷专负山之美【南屏山下】先得俯近山【一作水】之快【即苏公望湖楼】红梅阁于孙沔绿竹阁于居易巢居瘞杖于屏下四照插峯于镜外【二阁在孤山上】外如延宾望海蓬莱云汉正遍海防顾层见迭出之多而半为白鹤青鸾之所蔽【皆在道宫佛寺中也】复有如虹者六御笔仰题西泠处士宛武扬髻断桥非荒藓之旧长桥有古木之依琮老金佛【二桥在天竺前】节奔泉之所发行春合涧条众壑之攸归余则凌金跨玉斜斜整整将举趾而皆迷其或男帮女桂东游西泛画舫兰舟轻舫巨舰各标令名明渌清泛金胜小而善疾寶瓶大而宜缓明玉坐百客而有裕总胜列四筵而才半赏心泛渌百花望月皱绿翻篙流苏贴幔坐若室处行若物换值御舟之游幸从水嬉之宣唤前金吾而不禁后天香之拂面鳞如翼如恍众星拱辰于天河之畔非万斛之能拟岂千丈之为筭【史记船长千丈谓积数也】别有龙舟两两鼙鼓冯冯花帽表于御爱绣袍见于神歆陈百戏于水面竖六标于湖心【一作滨】参前两后三令五申观者舟两行如广陌迓者锦万竿如长林五步一亭

酒旆茶棚笙歌沸腾轩鞅纷纭柳行扑地花阵排云梭门秋千出没乎翠围舞衣歌扇周旋乎香尘新路习金鸡之跼【郊祀大礼歲则御前百戏预于南新路习肆赦之艺】祠山迎寶马之羣【二月八日迎七寶社马社祭于霍山张祠观者甚盛】目不暇瞬步不得循想见进鱼羹之宋嫂犹多呈鹤舞之优人翦罗钗采花之蓝范饴为穿柳之鳞饰木兵于小桁串家具于修筠篙矢激半空之霹雳纸鸢竞九天之经纶柘弹象弩画棍髹盆【踏混才泼巨盆皆水戏】罗袜凌波金钗照春时固多揽红拾翠之子亦岂无寻幽讨胜之宾此特言万一于春九十之辰薰风动弦清和云始粲里湖之栌林拂夹塘之荷翠紫燕瞥过白鸥乍起早崔祠之度【磁州府君六月六日诞辰都人于显庆观烧香已集湖中为避暑饮】正盾日之方炽水镜濯髮【谓善泅者】冰山厉齿移舟南向防衾夜防无人世之热恼有月宫之寒意艳丽见于水如见于仙醴【一作酿】鲜取诸舟如取诸市秋容不淡拒霜已红映后开之菡萏杂战水之游龙剖霜柑于骢辔簪露菊于船篷西山赋红叶之句南山醺紫萸之钟北风戒寒城人简出肉辇酒船亦无虚日延祥之红白梅城吳阜之高低雪域寶骑跃长隄而蹴琼瑶幔车穿名园而撷珠璣是盖四时之景不同亦各以见赏心乐事之不一尔乃既闻遨娱之盛请言风土之美水凭山而甘洁土得湖而丰泥菰菹取种于苕霅莲芡移根于檣李紫芋青菰白藕红芰文鳧章鴈黄雀锦雉鱼甜蠃香笋鲜芹脆松杉桧栢参术兰芷实钟此湖山之秀故无物而不备矧佳气之磅礴至人材而尤异所谓佣儿贩妇涵冰玉之不翅况彼都人士褚陶【晋人十三歲作赋才德为张华所称】杜栖【南齐人笃孝为学士】之文行全琮【吴人父令赍米数千斛皆以振饥贫者以功为大司马】许逵之忠义元絳唐肃【皆宋人有功德及物】广恩惠于民人伯玉【姓褚南齐人隱瀑布山累召不至】君复抱孤贞于林翳褚氏世济其美于大唐钱氏开国承家于五季顾欢郎兰之岂弟【宋齐间人以学术济人者由闻道而为】罗隱杨蟠之峻烈岂工诗而已矣惟此人物之盛不可殫纪方外则郭文王复马湘潘阆管归真之流以发挥其英声法照赞宁道潜清顺抱一子之徒以陶写其清气时人但知游观之可乐而不知景物緣人之可贵且自有天地即有此湖羣峯注流底而成瀕尚念东渐于海咸恶所濡草木鬻余而色变山川薄久而气殂所以消沮沈昧之不已虽有此湖而如无于是筑而防之使泾渭各得其所浚而辟之俾鸢鱼各遂其初风无大浪雨无奔湍将翱将翔以佃以渔以此知古人有功于此水将举一朝而利万世以无余何【阙】寶正以还六龙南渡搜胜抉奇重丹叠素致洞心骇目之观非晴光雨色之故彼徒知歲增侈而月益奢至以釜销金之为喻殊不知神京不返忧勤圣宁千官展转而择栖万姓彷徨而懷土故思极耳目之娱而为安旦夕之具不然中原岂无黄河泰山之雄观花石艮岳之奇趣日月云迈裴瞻顾嗟居人游女不能不极盘游无度之欢而志士仁人不能不兴宴安鸩毒之虑咸淳庚午歲作

游后湖赋【按此赋又载方回桐江续集】

三月廿又三日张鹏飞及方万里李和之白廷玉泛湖值雨各赋诗一首万里曰隄柳春浓万綠垂开懷消得好风吹絕怜白也诗无敌共赏坡仙雨亦奇兴欲狂时呼酒急境当佳处任船迟岂无顾陆丹青手画与人间后世知余戏作小赋云

柳絮化萍浓綠藏莺不见其处止闻其声此岂非春工之极致欤湛然宴坐轻舟自行万姿千态遠山纵横透防帘而湿衣忽骤雨之若倾甫下矻而闭户才顷刻而复晴白子酒稍酣矣畚

髯而慷慨曰此何为者邪抚流光之倏忽悟惨舒之不常于是诵赵抃表忠之奏歌苏仙荐菊之章彼割据于五季若钱氏之数王渺丘垄之无迹怆松楸其可伤涸银海而出金盃穴狐兔而上牛羊岂不亦雄杰一时兮终若雍门之泣孟尝赋梅处士妙解影香骨可以腐千古不忘郁孤山其硤兀拥万树之青苍罔蔗节之遗恨保故封犹若堂天道茫茫一雨一旻荣悴隆替柔刚微彰谓偶然不足芥蒂兮曰作善降之百祥谓理有必可恃兮曷顔夭而蹠长二客方李邀头目张噀无故而多事掇陈迹而揣量指金叵罗其犹浅兮举大白而浮【一作罚】之觴白子曰不然老陰为六老阳为九老则必变如屈伸肘惟知变者可与长久知六之变固乃可守知九之变健不为首顾此湖中之舟与舟中之人宁常壽而不朽能畏谨以自修庶吉亨而无咎幸乘时而过分负且乘兮致寇环绰约之蛾眉佩金印而如斗管弦沸其前后紫绯奔其左右一旦不能自保率同归于石友蠹苗窜于三危防风积【一作横】于九畝曾不见或裸体以罩鱼或跣足而踏藕侔带索之荣公甚泥涂之絳叟立层冰而弗寒茹野堇其适口无乐亦复无忧不自知其不偶岂不胜于梦晋而疾颠者乎此庄子所以不为庙牺而李斯所以忆上蔡之狗也舟且抵岸悉辟其牖赋诗各成肴核再取有化而无无化而有雨晴晴雨纷糅结纠斯时也度夕阳犹未至于酉多言数穷姑相与大笑尽樽中之酒

吴季子墓

圣人如日月下照无党私藏珠与韞玉所得自华滋恭惟吴季子夙稟明睿姿近取子臧节远绍泰伯基两以大国让廉风起蛮夷观乐义已烛挂剑心如飴时方尚诈力子独恪且祇时方事寇攘子独甘弃遗孔子不到吴闻风重赍咨佳城介申浦采地亦在兹特书寄余哀岂不遐还思惋惋龙蛇翥皎皎星日垂禹世懷道义取舍实擊之寄言邦之人无但岷首悲

题斩蛟桥

桓桓周将军英烈照千祀少年知自艾成人【一作仁】不惜死射虎南山下斫潜北桥底腾拏三日夜洒血四十里激波为岳立挥刃电亦驶想当批鳞初见义不见水及其立人朝矫矫中不倚文学既英发武事复霆起殲儿善丑正甘作忠义鬼至今有生气耿耿耀青史苏公百世豪气味有相似泊舟蛟川下洗石题所以平生疾恶意十有二言里丰碑刻祠宇词翰晋二美二美固足珍吾取不在是

同陈太博诸公登六和塔

龙山古化城浮屠峙其巔开殿生妙香金碧森贝筵应真俨若生倒飞青金莲头陀紺林丛导我丹梯縁初犹借佛日闕境儵已 回头失谁何叫啸衣相牵且复忍须防当见快意天娇儿诧先登网户相钩连炯若蚁在珠九曲随盘旋烂烂沧海开落落云气悬羣峯可俯拾背阅黄鹄騫奇观兴懦夫便欲凌飞仙絶顶按坤维始见南纪偏神京渺何许王气须停【一作停须】躔舟车集百蛮岛屿通人烟一为帝王州气压三大千罡风洒毛髮铎语空蝉联红红杏园花愧乏慈恩篇

冷泉亭

灵山本清淨一泉渟其中灵山孤飞来此水将无同山影压不尽照见天玲珑分明千尺冰不独疑寒虫京洛多风尘到此一洗空炎寒无二心凜有操者风泊然守空梵万劫岂【一作无】终究骊山有温泉虚【一作曾】筑华清宫

题松雪临郭河阳溪山渔乐图

遠山近山何歷歷下有长溪横一碧溪中亦有钓鳌手此手不遮长安日野桥烟树接草庐飞流如练悬空虚截山白云凝不去要人写作岩居图

河南妇【按辍耕録妇世为河南民家元兵下江南妇被掠姑与夫行求数年得之河南妇已嫁千户某饶于财情好甚洽视夫姑若涂人防有防凡妇人被掠许银赎敢匿者死某惧罪急遣妇妇坚不行夫姑留以俟妇闭其室弗与通遂号恸顿絶而去行未百步青天无云而雷回视妇已震死】

从军古云乐获罪祷应难母望明珠复夫求破镜完押衙逢义士公主奉春官为报河南妇天刑不可干春日田园杂兴【月泉吟社第十八名唐楚友即湛渊先生也】

雨后散幽步村村社鼓鸣陰晴虽不定天地自分明柳处风无力蛙时水有声几朝寒食近吾事及躬耕【月泉吟社评曰前聯不束于题柳处蛙时一聯题意俱足格调甚高结亦不浮】

山中懷友

几年音问絶此夕更關情寒雨人孤坐残灯鴈一声干戈犹故国贫病自空城惟有琴堪诉愁深弹不成

清和

白苧渐相便因知物候迁空山一雨后小檻綠陰前莺在留春思人幽減昼眠此时风日好元不似梅天

余杭四月

四月余杭道一晴生意繁朱櫻青荳酒綠草白鷺村水满船头滑风轻袖影翻几家 事动寂寂昼关门

游宜兴张公洞

天开福地据雄尊果老张公几代孙一窍通天才直上千崖转石已平吞山头白鹤来无影石上青骡去有痕我欲放身如脱屣仙凡一辙隔重阍

净慈禅寺

奎额昭回龙屈盘入门已觉厌尘寰何当白髮三千丈来寄清风五百间帝子釜摇金防灊家人卦剔翠潺顔西湖日日船如织半在南屏第一山

湖楼玩雪

上湖十里卷帘中幻出瑶华【一作台】第一宫山势蹴天银作浪柳行扑【一作横】地玉为虹渔蓑鹤氅同为我【一作伍】爵舌羊羔不负公明日凤池朝退蚤一鞭曾约试吟驄

酒边赠朱处士

乌葛唐巾白苧裘扫庭终夕共淹留醉中谈论心犹壮老去歌欢泪亦流对客呈诗如献佛课儿收橘当封侯明年好理西风棹重约三吴烂漫游

游天竺后山

山转龙一径深岚烟吹润扑衣巾松萝掩映似无路猿鸟往来如有人讲石尚存天寶字御梅尝识建炎春城中遮日空西望自与长安隔两尘

竹陰

占断人间潇洒地全身水墨画笈筇非烟非雾一林碧似雨似晴三径凉翠袖佳人黯空谷白髭道士隱南塘数竿醉日君须记移向西窗补夕阳

题苏东坡书楚颂并菩萨蛮满庭芳词卷后

南荒九死幸生还种树书成手自删赤壁梦难同楚颂洞庭乐不减商山人生墮地少如意老子对天无愧顔千古菟裘有遗恨断珪残璧自人间

续演雅十诗

海青羽中虎燕燕能制之小隙沈【一作乘】大舟关尹不吾欺【海青俊禽也而羣燕緣扑之即坠物受于所制者无小大也】

草食押不芦虽死元不死未见滌腸人先闻弃箠子【漠北有名押不芦食其汁立死然以他

药解之即苏华陀洗腸胃攻疾疑先服此】

谁令珠玉唾出彼藜藿腸仁人不为寶良贾宜深藏【和林有尼能吐珠玉杂寶】

嬰啼闻木枝羝乳见茅茹何如百年身反尔无根据【漠北种羊角能产羊其大如兔食之肥美嬰啼木枝见山海经所载】

西狩获白麟至死意不吐代北有角端能通诸国语【角端北地异兽也能人言其高如浮图】

才脱海鹤啄已登方物輿仰面勿啾啾我长非侨如【小人长仅七寸夫妇二枚形体毕具】

羯尾大如斛坚车载不起此以不掉灭彼以不掉死【西漠有羯尼大于身之半非车载尾不可行】

八珍殽龙凤此出龙凤外荔枝配江防徒夸有风味【谓迤北八珍也所谓八珍则醍醐 沆野驼蹄鹿唇驼乳麋天鷲炙紫玉浆 玉浆也 玉浆即马奶子】滦人薪巨松童山八百里世无奚超勇惆悵渡易水【取松煤于滦阳即今上都去上都二百里即古松林千里其大十围居人薪之将八百里也】

两驼侍雪立终日饥不起一觉沙日黄肉屏那足拟【沙漠雪盛命两驼驮其旁终夜不动用断梗架片氊其上而寝处于下暖胜肉屏且不起心兵也】

积雪峯访梁道士【刘大彬茅山志作积金峯】

惊羽穿林看细碎健輿绕石聽欹斜道人住近茅峯北一簇楼台五色霞

湖居杂兴八首

御舟初出赏春霏传是诸王与后妃香雾渐深帘幙暗日斜微见淡黄衣

脉脉吹香屋角梅背风移烛小帘开鳳城几日元宵近一片箫声水上来

龙舟晓发断桥西别有轻舟两两随春色可人晴较稳酒家争出柳梢旗

相国平泉水竹居吳山【一作中】花石世间无游人马上休回首一半春风在里湖

雨后林塘夏亦秋一葫芦酒在船头醉来深入荷花去卧看青天飞白鸥

三贤犹得仰高风冠服虽殊气味同后五百年无继者桃花含笑夕阳中

车鱼人散水风腥雨色凉分柳外晴回首夕阳都落尽忽然东向数峯明

万树芙蓉两堦宫秋风开遍水边丛白墙遮尽红墙出只见红墙一半红

翔泳堂酒边【堂在西湖永壽寺】

环辞度得【一作出】雪儿歌浓墨斜书碧玉柯醉折芙蓉薰酒盏里湖凉似外湖多

题江贯道百牛图

几年散放桃林后余四百蹄犹可骑揽镜【一作境】挂书多自在能骑惟有一凝之

题龚翠岩中山出游图

何处张弧鬼一车中山曾见夜搜图纷纷眼底朱成碧后乘钟家有此姝

玉清宫与赵达夫鲜于枢联句二首【宫在西湖锦坞宋绍定初建】

湖光【一作田】漠漠水禽飞【达夫】堤柳斜斜带夕晖【枢】二月江南好天气【珽】
初阳台上惬春衣【枢】

巾子峰头舣钓船【达夫】初阳台上坐鸣弦出云高树明残日【珽】过雨苍苔泣细泉【
枢】絶俗谁能继高【一作遐】躅凌云【一作虚】我欲学飞仙【达夫】还家正恐乡人
问【珽】化鹤归【一作重】来知几年【枢】

灵隱寺暮归

山色晚苍苍山门下夕阳梅林飘榭叶新月到禅牀迳出千峯秀亭廻一涧长淹留不可及露
湿薜衣裳

宿上天竺

名山倦游历挂起手中藤佛国三生石天岩百歲僧定回松院磬吟苦雪龕灯愧我心犹杂何
因问二乘

西湖访古

隱约湖【一作湘】山一防青秋风归去阻云程贝宫珠阙无寻处夜夜凌波哭月明

山居懷林处士

昔有【一作在】林处士结庐邻峯巔年年不入城梅花有佳联童鹤三数口负郭十畝田弟
侄列朝裾咸平好时年人品既已高奉养常充然嗟我何为者日用买山钱爱诗不能佳未了
区中緣空有一寸心羨杀处士贤饱看贵人面不若饥看天捶牀呼伯雅且此相周旋有田足
几时卓哉坡翁言

题郑子真画四季诗意

红杏綠杨永昼野服柴門散仙莫道无人知处东风都在吟笺

莲叶吹香澹澹扁舟撐港斜斜惊散一行白鹭西风卷起梨花

贈张知府周卿

人品中原說此翁雄文直气耿心胸几年天上张公子今日云间陆士龙来暮已闻歌五袴平
反何翅禄千钟相从愧落诸公后拭目西岩第一峯

贈青龙任月山

倾盖相逢意已亲风流儒雅迈同伦曾来东阁观奇士又向西湖见伟人放棹小溪梅嶺嶸敲
棋深院烛燐燐悬知后夜相懷切帆落胥山月一轮

题洞霄宫药圃

仙翁曾播植琼圃尚敷荣春日祥光满秋风瑞实成黄精宜益壽萱草足忘情候采灵芝服还
应羽翼生

蛾眉亭

秦赭凿填石不受鞭捶考零落楚江浒相峙矗三岛穿松得细迳据一陵二小奔流浩浩来五
色烂华藻至寶地不惜絕境天所造谁言两蛾黛功夺京兆巧终朝对顰蹙似为今古恼然犀
矾沉沉跨鲸月皎皎丝纶三千丈蒙冲百万櫓天风吹过梦多忧只空老今者吾与子所愜在
幽讨供帐莫恩恩槃觴从草草雅琴鼓一再领此风日好临崖发清啸倚树或颠倒礼存玉帛
外纵弛或一道兴极不知归白沔破晴昊

李翰林墓

出城得佳山两峰特奇诡一如植躬圭一峰拱而侍我见犹爱之而况谪仙子孤坟在其下政尔直一死谪仙真仙人出处见诸史岂敢傲吾君辛苦植唐祀嗟予僂僂者尘土正如此停车不忍发载拜颡有泚仰止青山高清风与终始孰谓千载人不在天地里

题如镜净讲师房

娱老林房世路除尘埃飞不到袈裟西湖草木虽同土北寺烟霞自一家静敞白闲翻贝叶闲输赤仄养椒花鉴光炯炯辉今古身后何须用五车

春日重过如镜上人房

忆昔敲门赋瑞筠鹿园佳话又重新屋头能拓三三径林下知非陆陆人凿沼何须晋康乐种荪还忆楚灵均老师链得心如镜更把高台比月轮

题惠山

名山名利大佳处紺殿翠宇开云霞陆羽廛事已千载九龙诸峯元一家雨前茶有如此水月里树岂寻常花奇奇怪怪心语口无根拄杖任横斜

题碧桃折枝

都千树欲无枝全得春风烂漫吹晓露未晞红郁郁仙源长在日迟迟

吊林处士墓

千古西湖见一贤断碑犹在草芊芊人间岂少题梅者石上谁来酌菊泉陈柏墓门疑是宅唐衣庙貌望如仙可怜辽鹤无消息寂寞春风二百年

击蛇笏

孔明庙前柏手版贼其枝枯稀无生气众目炫一时何如孔公笏鉄面含霜姿虺蛇何足道正气屡奸欺祥符庆厯间岂无纤人斯闻之胆为落不在彼在兹圣学亿万年圣源浩无涯八传得巨源愤学求似之遗经与遗物保防如婴儿万里去复逺见者咸赍咨况此一尺槐千载孔林思非无原壤杖非无少正铍用舍各有时小大各有施畴能起段公共赋甘棠诗

寄天香庵恬上人

门掩天香竹树丛了无尘翳此心同东林社散图空在南国山多梦不通白草秋闲支遁马黄沙春断子卿鸿思君记得逢君处一片归云海树空

岳武穆精忠庙

国势已如此孤忠天地知死生同父子奸宄系安危偃月无封桧栖霞有谥碑中原遗老在歲歲夢王師

三月八日过西马塍

散策好春日湖西古马塍陰晴虽不定天地自分明柳处风无力蛙时水有声园家分半席问得御花名【按此首见成化杭州府志中二联与田园杂兴诗同】

过东寺

倚空楼阁竞翬飞铁凤金铃一望齐多少流民无片瓦江南四月雨凄凄

止征妇哭

战国曾闻挟两戈病中军不渡交河一身同为明庭死死敌强于死病多

大易集说序

易言吉凶悔吝进退存亡无非切已之用迩年以来谈易者棼棼借借三人是之一人非之则攘袂瞠目而与之争谦卦谓何三人非之一人是之则扬眉顿足而为之喜颐卦谓何呜呼徒能言不能行易之道几乎熄矣苏台俞玉吾乐贫安道华皓一节于易则不但能言之又能行之辑先儒诸名家之善为是书条列牖分醇正明白深有益于后学所居榜石涧学者称石涧先生云皇庆元年春将仕郎江浙等处儒学副提举白斑序

淮云寺化緣序

佛庙之治有二补飭故物为二梵福崇建新制为三有利崇建之利三谓入海安稳多获重寶欲作寺且不贪惜也噫凡天下事即以利而后有所为是名未离尘着虽然苟利一一切不间緇褐无论苍雅皆宜有为但利已不利于人利寡不利于众岂徒尘着犹之贪惜可也昆山太仓之陈泾前无寺自顾氏由淮而吴占地清旷而通上人与师正庭结茅而栖焉且曰吾里崇明有永宁而民日趋于善惜寺薄海隅涛鬻风击歲虞欹垫欲迁善地而未能也我佛创四庙两塔或伽邪山或祇陀园如白云去来随所止息无有方所若即此殊胜有所建推原其本顏曰淮云锐心善果日增月益克臻于有成不四三年紺楼翠宇翬飞金丽若就地涌出梅林嶷嶷法轮囷囷食有堂寢有寮行有庑衍膏腴以丰巾鉢辟崇深以继薪水首踵寒暑之奉罔有或阙呜呼今念慈教徧天下招提兰若如恒河沙数岂系有无于太仓一沔地哉徒以象教所至如日之无不照云之无不覆使人观感兴起为善者众于国家政教与有助焉为是緣果非了通其谁尚勉之哉至大庚戌正月既望述

跋顏魯公刘中使真迹【又名瀛州帖】

瀛州帖视魯公他书特大而凛凛忠义之气如对生面非石刻所能仿佛也余生平获见真迹二小字麻姑记与此耳尝有云桃源在何处乃见世道污所以顏魯公细书记麻姑事近荒忽时贤者适嬰多虞世降俗卑陋假异境以明其志殆子欲居夷也虽魯公忠贯日月功载旂常固不待善书名于代况笔精墨妙若是耶昔桓彝渡江伤晋之弱及见王导辈语则知有托足之地余于是观公剪禽之帖亦知夫唐燭未熄坎史侯处厚尚义士也旷歲月而得之既得之非尚义者不出示处厚知所尚哉钱塘白斑题

跋米海岳临唐 宗书鹄鵠颂

余生平见米氏真迹将八九种皆晚年放纵之作其摹学古人者惟诸石搨中见之墨迹不多得迺来得见此帖然后知米氏之剑拔弩张悉从小心翼翼中来也论者谓元章之书沈着痛快超妙入神不亚于唐 宗当并肩齐驱耳何故摹之吁此以管窥天未知书之奥妙者也凡天下事最忌自满器满则盈舟满则覆故狂夫之言圣人择焉君子戒于阙党也况右颂笔法结搆迺媚精神骨立不狃于世习得自然丰度亦有元章所不能到者今截长补短更觉神韵不凡耳所谓至寶必百镕炼而后成者耶然元章摹书与他人异元章此帖与他帖异将来必有肯余论者钱唐白斑

赵临褚书跋

褚公书 六朝众长而成一家于代何独枯树赋而已子昂后五百年一振豪顷夺其符而代之岂规规学褚而能之抑胸中有所谓 者也谓予不信有木居士在

木斋王公孝感白华颂【并序】

古孝亲之感以致物之异多白故刘殷白雁林攒白乌程袁师白狼梁文贞白兔而诗之素冠白华可见矣若宇文周之王崇神草生庭以有德感无情登之信史传以为祥不可诬也今木斋王史君孝母之徵着朱华白实于离根去土之瓶盎此又因心之效贯于神明者钱塘白斑谨拜手为之颂曰

草木何知所知者天母也天只隔彼壤泉事死如生将终身焉酌水献花罔或不防洁白之感着于几筵德有所届在尔象贤守富守贵孝忠则全国人称颂【一作愿】憇棠树萱斂华就实遗训乃宣播此徽烈本支永年

湛淵集附錄

元故湛淵先生白公墓銘

宋濂

嗚呼是惟湛淵先生白公之墓先生諱珽字廷玉白其姓也出于宋丞相時中之裔世居文水時中之從子翼扈跸南渡官至防禦使生武畧大夫良輔食邑櫛李因家焉武畧之後又至武功大夫顯始占籍于錢塘生修武郎必騰修武生通武郎嶸先生父也妣方氏先生本四明名儒少度遺腹子通武育以為嗣五歲能屬對八歲能賦詩十三受經太學為科舉業轰然有聲場屋間一時貴人爭欲出其門下甫及壯元丞相巴延平江南聞先生賢檄為安豐丞辭不赴乃客授藏書之家晝繙夜誦燈墜花穴帽不知也如是者一十七年程文憲公鉅夫劉中丞伯宣前後交荐之復以疾辭中歲嘗出游梁鄭齊魯歷覽河山之勝登臨吊古訊人物風土慨然有尚友千載之意及至燕王公貴人見輒賔禮或欲舉為東宮官者先生復引義固辭南北孤遠士久困逆旅則必昌言甄拔之自是學益充文益富而家益貧宣尉都事鮮于公樞帥一時名士援杜甫邵堯夫故事共買屋使之居防李文簡公衍出將使指喟然嘆曰有才如是坐視其窮可乎力挽起之授太平路儒學正先生不得已應命未幾攝行教授事悉心官政修建天門采石二書院政成當時事例可貢行台令史達官勸之行先生笑曰吾守章縫爾它何覲哉尋轉常州路儒學教授兵燹之後禮殿與堂庑皆廢弗治祭器載籍亦闕先先為完之且復侵疆三千餘畝俄再遷教授慶元未上翰林集賢兩院謀曰白先生淹回下列吾儕不肖齒一言可謂汗顏矣共尉荐之陞江浙等處儒學提舉司副提舉階將仕佐郎時鄧文肅公文原實為之長與先生志氣膈合舉刺得宜文化大行秩既滿銓曹有不知先生者署淮東鹽倉大使先生自以鹽防非所諳習不俟終更即謝事養疴海陵遠近學徒担簦相從者殆無虛月先生已六十又七及再遷從事郎州路蘭溪州判官則不复有宦情矣日與韻朋勝友曳杖游衍銜杯賦詩惟恐日之易夕所居西湖有泉自天竺來及門而滙榜之曰湛淵因以自號晚归老栖霞又号栖霞山人以天曆元年九月十五日卒年八十一其年十一月二日錢塘縣履泰鄉栖霞山之阳其子遵治命題曰西湖詩人白君之墓云先生性至孝母病刲股和藥起瀕死者再及歿号慟自擲呕血至數升父感奇疾醫言必得兔屎可疗先生踏冰雪緣崖穴求之三日不得父死抱尸哭絕而复苏继母虐不予厥子先生事之愈恭既而改适他氏无儋石之儲先生為營朝夕且負其避兵迄免于難然汲汲行義尤不顾家之窶孤嫠不能昏者嫁之死而无所归者藁葬之道中拾遺珠待其人訪索审而还之或以质剂假金匱乏不获偿焚而慰之生平无骄辞怠色一以谦抑为事闻人善未尝不艷慕见扬人过掩身亟避去奉先之外不惑异端不諂瀆鬼神疾疚忧患之来一委之于天自幼至老无一日废问学故能长于诗文紫阳方公回称其冠絕古今有英雄大丈夫气剡源戴公表元谓其注波五经之渊披条百氏之畹庐陵刘公辰翁又言其不为雕刻苛碎苍然者不惟极尘外之趣兼有云山韶防之音皆确论也翰墨虽其余事亦有晋魏风酒酣命二童持纸悬笔一挥疾如雨风声光翕然四达而先生素志邱壑以退为进故位不逮名君子惜之先生娶沈氏有贤行前二十七年卒子二賁文林郎南安路总管府經歷采温州路永嘉县鎮海東寨巡檢女一归常州路儒學正鄭禾孫四栩越東明皆蚤世孙女一适平陽宋允恒允恒由紹慶路儒學正陞授新州新興縣福緣寨巡

检贲以子天命允恒仲子范为后范有学而文能继其家者也范生子二 弢女三先生所著
书曰诗曰文曰经子类训曰集翠裘曰静语皆二十卷尝徼诸梓四方多传诵呜呼先生已矣
濂生也晚虽不能识先生幸从乡先生黄文献公游听谈杭都旧事有如淮陰龚公开严陵何
公梦桂眉山家公之巽莆田刘公防西秦张公模虎林仇公逵齐东周公密凡十余人相与倡
明雅道而先生齿为最少乃与羣公相颉颃南北两山间其遗迹班班故在仅逾五十春秋而
先輩流风遗韵弗可复见不亦悲夫呜呼死者固不可作若并其言行而不彰将何以为耸善
扶俗之劝于是徇范之请鉅细毕书之呜呼先生之名其果待文而后传哉铭曰

虎林有哲夫兮秉德良优柔嗜义如嗜利兮避名如避讐指退以为进兮谦抑每自修知分中
自定兮不假外物求天经况所惇兮血泪交頤流冠冕百行先兮伦品庶不偷发越见声诗兮
笙鏞间鸣球律品素和协兮八音交相缪雄章落四海兮虹气日夜浮栖霞有名山兮草木光
如油纪德荐石章兮千古振诸幽